

JA MYĪDU'UKPĪ NØKY MIDI JA PABLO TYANĪGAJX JA TESALÓNİKĪT JAA'Y

Ku ja Pablo tnijayi pøn ja nwindson'ajtim tjanchja'widip

¹ Pablo ø nxøøw, jøts øø yam nguejxpy ja nøky møøt ja Silvano jøts møøt ja Timoteo, jøts øøts ja ndaniguexy pøn jaty tjanchja'widip ja Jesucristo yja' jam Tesalónica kajpkøjxp, pøn møøt amumjoojt t'etti ja Dios Teety jøts møøt ja nwindson'ajtim Jesucristo. Nay ja'ats amuum mgunuu'kxiðip jøts ja jotkujk'ajtin mmo'ojidit møøt ja nwindson'ajtim Jesucristo.

Ku ja Tesalónikit jaa'y tyiktaañ ja ejxpajt sa ja Dios yikjanchjawi

² Ejtp øøts ja Dios ndukmøjawi ndukunuu'kxyjawi ku meets ja xjanchjawi, jøts ku øøts ja Dios n'ajot'aty ejtp mee nja'myech.

³ Ku mee ngajpxpaaty ku øøts ja Dios n'ajot'aty ka'ap øøts ja nja'dyigøy ja m'øy'ajtindi, sa ja tsojkin ja pa'ayo'owin xmøøt'atti, jøts sa ja ajot'ajtin møk'ampy xjagyapti jøts xjøp'ejxti ku mye'ent jadigojk ja nwindson'ajtim Jesucristo.

⁴ Meets migu'uktøjkti, pøn jaty ja Dios janchja'widip, Dios mee mdsojkip jøts nay ja' tø mwi'ijxyidi jøts mee mnitso'ok'att.

⁵ Jade'en'ampy øøts nnijawi ku øøts jam ojts ja Dios y'øgyajpxy ja y'ømyadya'aky ngajpxwa'kxiyi

mā meets jam, kidi øødsip ja ojts jade'en nugo ngajpxy, pø jamxi ja Espíritu Santo ja myøk'ajtín ja tmøødiyí jøts ja jade'en wā'ats yiknijawit jøts ku ja'abi kajpxy jøts ku ja'abi ayuujk tyiyí yjanchi. Wā'atsxi xnijawidi jøts ku øøts ja nduun, kidi øødsip ja kø'øm nadyamiduuñip pø ja'agøjpxxi øøts ja nduñ jøts meets ja xyiktu'unt.

⁶ Ja Espíritu Santots mee mmøøjyip ja xyondaajkin jøts meets ejtni xoni xkupøkti ja Dios y'øgyajpxy ja Dios y'ømyadya'aky øy meets ja kawine'en tø xkuwanjati. Xjats meets nayide'en xuñ sa tø xpa'ejxti ku øøts ja ayo'on nmidani midi ja nwindson'ajtim tø ttunjøpi.

⁷ Xjats jade'en tø mbidsømdi jøts ejxpajt mwā'andi jøts ja mni'ejxu'udyidi niduki'iyi pøn jaty ja Dios tjanchja'widip, pøn jam tsinaadyip Macedoniit jøts jam Acayit etjotp.

⁸ Jade'ents idø'øn ja Dios y'øgyajpxy ja y'ømyadya'aky tø xyikwa'kxiyidi, jøts kidi jamyip meets ja jade'en nugo tø xuñ Macedonia uk jam Acaya, yiknija'wip yø o madsoo jøts ku meets ja Dios amuum xjanchjawi. Ti sa øø njaakwa'ant, ti øø njaakniyajpxp.

⁹ Ja'axi ja kø'øm tmadyaktip jøts ku øøts jam ojts n'øch mā meets jam jøts y'øjja'widip ja' sa meets jam ojts xkupiky, jøts øy ja yikxon tñimadya'akti sa mee xmajststujty ja'abi winmaa'ñ midi ja Dios kyaja'ajip, jøts ku ja Dios tu'ugyi tø xpabøjkpinaxwa'akti pøn xemikøjxp ejtp, pøn tu'ugyi Dios'ajtp.

¹⁰ Jøts ñayinimadyaktip ja nayide'en sa meets nwindson'ajtim Jesús xjøp'ixy jøts ku ja jadigojk wyimbett jap tsajpjøtpy ja Dios U'nk, pøn ja Dios

Teety tyikniwaajts ja o'jkin jøts ja tyikjujkyjky. Ja'ats adøm idø'on xuknitso'ok'ajtindip ja' ayo'on midi memp midi wingomp.

2

Sa ja Pablo kyajpxwa'kxy jam Tesalónica

¹ Mnija'widipts migu'uk ja'adi, jøts ku øøts jam n'ats'øjch mā meets jam, ka'ap øøts ja nxøøw nugo wyindigøøy.

² Øy øøts jam wyinaty Filipit kajpkøjxp tø nyik-jemduñ, mnija'widipts ja wa'ats jøts ku øøts ja Dios tø xjanchpudøki jøts øøts ja kyajpxy jøts øøts ja y'ayuujk ja tø nyiknajxyi amumjoojt midi xyiknitso'ok'ajtindip, jøts meets ja tø myiktuk-madøy yam idø'on ja tsep yjanchjatuñi.

³ Jøts ka'ap øøts ngajpxigøy ti jaty øøts ojts ngajpxwa'kxy, jøts kidi wenk winmaa'ñip øø njagyejpy ku øøts jam jade'en ojts ngajpxy jøts nika' myikwin'øøndi.

⁴ Pø tiy'ajtinx i yø', tøxi ja Dios kø'øm tyikutuky jøts øøts ja tø xanipiky ja kyajpxy ja y'ayuujk midi yiknitsokp, jøts jade'ents øøts ja tø ngajpxnaxy. Jøts ni ka'ap øøts ja n'ixa'ay jøts øøts ja kuwani ndyimyikta'øy'ext uk ndyimyiktakajxa'lakt, pø ja Diosxi yikmidump jøts ja'ats tu'uk tu'uk t'ejxp sa jaty pøngapøn yjaa'y'aty.

⁵ Jøts mnija'widipts ku øø ka' nugo ngajpxy sa jaty ojts myiknøjmidi jøts nigidi taayip øø n'ixaapy sudso øøts ja meeñ nbøkt. Ja Dios yø tnija'wip jøts ja' yø t'ejxp.

⁶ Niwindii øø ngawa'añ jøts øøts ja jaa'y xwindsø'øgit, wan meeds i uk øy tyimyjapøni.

Xpaat'ajtpimts øøts, øy øøts ja jeexyip jade'en tø nduñ jøts meets jeexyip ja nwindson'ajtim Jesús kyutujk møk'ampy tø ndanipiky, pø ja'axi øø nbadumpy.

⁷ Ka'ap øøts jade'en tø n'adi'ich; øy yikxon mee tø nmiyujy'aty sam ja u'nktaak tyikyeeke tyiktsø'øky uk t'ejx'ity ja y'u'nk ja y'una'jk.

⁸ Njanchøjkpy meets mjanchpa'ayøøpy meets, jade'en pyaat'aty jøts øøts jeexyip ka'ap ja Dios kyajpxy ja'ayi nugo tø nyajkiyi, ngu'o'jkippaat meets jeexyip ja'agøjxp ku ndsokti ja'agøjxp ku nba'ayowdi.

⁹ Mee migu'uktøjk, wā'ats inet xja'myatsti sa øøts y'ijty nduñ nbiky, sa øøts nnamyiwīnmaa'mbyaadyi jøts øø nbaaty ja nidsinaajyk. Ku øø nduñ xinaxy tsunaxy, ngamaa'y nga'ity øøts, jøts jade'en ka'ap myik'adsepti ku myikmo'odi jade'en ja Dios y'øgyajpxy ja Dios y'øy'ayuujk.

¹⁰ Mee nagyø'øm mnija'wip jøts møøt ja Dios, jøts ku ka' ti tundigø'øyin myiktu'unxidi. Yikxon øø njaa'y'aty jøts øøts jade'en ka' ti pøky xaja'aty øy øø pøn xjapøky'ejxwā'añ.

¹¹ Jøts mnayi mnija'widip nayide'en sa nidu'uk jaty tø myik'ayo'ejxti ku myikajpxjot'amøjkidi, jade'en sam ja jaa'y ja tyeety yjagyepyiyi.

¹² Tøxi myiktukmadowdi jøts ku øy yikxon mjaay'attit sam pyaat'aty pøn ja Dios ja'ajtidip, pø ja'axi kø'øm wamp jøts meets ja mdaniwaadsowiyi ja kyutujktaajk mā ja amuum xyiktuujnidit ja myøk'ajtin, ja y'øy'ajtin jøts ja xyondaajkin.

¹³ Ja'agøjxpts øøts idø'øn ja Dios ja ndukmøjawi

ndukunuu'kxyjawi ku meets ja kyajpxy ku meets ja y'ayuuujk ja ojts xmadojyiyi midi mee ndukmadoow. Ojts ja xjanchkupøkti jade'en jøts ku ja Dios ja tja'aji, kidi nugo jaa'yipxi ja' yja'. Jøts janch tiy janchts idø'øn ja', jøts ku ja Dios ja tkajpxyi jøts ku ja Dios ja t'ayuuuji, jøts ja mbudøkiyidi pøn jaty ja tjanchja'widip.

¹⁴ Mee migu'ukti, ku tø xku'ayo'ombaadidi ja Dios, kawine'en ja mmigugajp tø mdagubetyidi, nayide'en tø mjatti sam ja jaa'dyi pøn ja Dios tjanchja'widip pøn ja nwindson'ajtim Jesucristo tjanchja'widip pøn tsinaadyip jam Judea, pø nayide'enxi ja tø yjatti, nayide'en ja myi'israelit jaa'y ja kyamee'kxyidi.

¹⁵ Yø'øbi israelit jaa'yts idø'øn tyik'oo'ktøø ja nwindson'ajtim Jesús. Nayide'en ttungojmidi sam ja tø tyik'ookti ja kyø'øm migu'uk pøn jaty ja Dios kyugajpx'ajtpy, jøts øøts ja tø xpawøpy. Niwine'en ja Dios ja tkayikjotkujk'atti jade'en, jøts yjanchtumwenk'ejxtip ja jaa'y øy pøn,

¹⁶ jøts ku øøts ja Dios yja' njadukmadoowa'anmiyi pøn ka'israelit jaa'dyi jøts ja ñitso'oktit, ka'ats øøts ja jade'en xuktunwami. Xjats jade'en ja pyøky nugo tyikmiweni'adø'øtsti. İxyamnimts inet ja Dios ja møk ayo'on tø tyuktagida'agidi.

Ku ja Pablo øy tjapaatwa'añ jadigojk ja Tesalónikit jaa'y

¹⁷ Mee migu'uktøjk, ku ojts nnawya'kxyindi jøts waani ñajxy ja et ja xøøw, nja'myajts'ijtpyim meets øy mee njaga'ijxy jøts øøts njanchja'atsnøjkxwa'añ kawinaak ojk jøts mee n'ats'ext.

18 Ojts øøts njadyimya'uktsøøñ; øts meets jam kø'øm kawinaak ojk tø njadyimy'ats'ejxwa'añ, jatyï jatyits øøts ja miku' xyiktuu'duky jøts øøts jam nganijkxy.

19 Jøts tigøjxp øø nxonda'aky, ti øøts idø'øn ndaxondakpy, ti øøts idø'øn njøp'ijxpy, ti øøts idø'øn ndajotkujk'ajtpy, pø meetsxi dø'øn ndajotkujk'ajtpy ku mye'ent ja nwindson'ajtim Jesucristo.

20 Meetsxi dø'øn ndajotkujk'ajtpy ku øø nxonda'aky.

3

1 Jade'en'ampy øø tø nwinmay jøts øø nda'ant yam Atenas kajpkøjxp ku øø ka' n'ukmajadañni, kumi ka' øø n'ukmidanaañi jadine'en ja jotmay,

2 paty øø tø nguexy tu'uk ja nmigu'uk pøn jam tø m'ats'ijxyidi. Timoteo øøts nguexy, ja'axi ja Dios tmidump jøts ejtp øøts ja tø nmøøtuñ ku øøts ja nwindson'ajtim Jesucristo y'øgyajpxy ja y'øy'ayuujk tø ngajpxwa'kxiyi midi ja nitso'ok'ajtin tyajkp, ja'ats mdukmadowidip jøts ja mgajpxjot'amøjkiyidit jøts ja m'ajot'ajtin tu'ugyi xyik'ettit,

3 jøts jade'en ka' pøn t'ixmatst øy idø'øn ja tsep jade'en y'ity. Wa'atsxi kø'øm xnijawidi jøts ku jade'en ja ayo'on nbaajtindit.

4 Jøts ku øø nay jam wyinaty møøt meets, ojtsxi øø nnigajpxy jøts mee ndukmadøy jøts ku n'amajtindit ndsaachjajtindit; tøts xnijawidi jøts ku jade'en tø yjanchjaty.

5 Paty øts, kumi ka' øts jadine'en n'ukjotkujk'ajtni, ja'agøjxp mee tø ndaniguexy

ja jaa'y jøts ja tyiktø'øt sa ja mjanchja'win xyik'etti, ja'ats ø ndsø'jkp uk wan meets ja miku' tø mduktuñidi ja yja' jøts jeexyip ja Dios kyajpxy jade'en nugo ñiwyindigøy sa meets ja ojts njadukmadøy.

⁶ Tøts ja Timoteo wyimbity jam Tesalónica jøts ja yam tø tmija'aty ja kajpxy ja ayuujk midi yikjotkujk'atym jøts ku meets ja janchja'win møj xjagyepy jøts xyiktuujnidi xem yam ja Dios chojkin. Yide'ents ja yam wya'añ jøts ku meets ejtp xja'myech, jøts ku nayide'en ja tsojkin xjagya-jpti jøts øø xjapaatwa'añ nayide'en sam mee nja'ejxwami.

⁷ Ñiyjot'amøkpøjkp øø migu'uk yjawi, ku øø nnimadøy jøts ku tu'ugyi ja Dios xjanchjawidi, yam øøts idø'on yjawi yide'en tsep'agujkpy njaty.

⁸ Ku øøts jade'en nnimadøy jøts ku ja Dios tu'ugyi amumjoojt møøt m'etti, jade'en øø nnayjawiyi tyimxyajimbejtp øøts yjawi.

⁹ Ku meets jade'en xuñ, øy øøts ja Dios møj njanchtamøjawi ku meets jade'en xpadundi ku jade'en xwindsø'øgidi ja Dios.

¹⁰ Xjats øøts yide'en xinaxy tsunaxy ja Dios n'amidøy jøts mee ndyimy'ats'ext, kø'øm ndyimy'atspaattit, jøts ka'pxy myiktukmado'odit ti jaty mjaaka'ejtxidip jøts ja mjanchja'win tu'ugyi t'ettit.

¹¹ Ja' øø ndsøjkpy jøts øøts ja Dios Teety, jøts øøts ja nwindson'ajtim Jesucristo xpudøkit jøts øøts jam nnøjkxt jøts jam m'atsyik'ejxtit.

¹² Nay ja Diosts myikmøjta'agiyidip ja mwinmaa'ñ jøts ja tsojkin møj xjagyaptit nixem niyam, jøts xminamyayidit øy pøn møøt nayide'en

sam mee myiktsoktin sam meets ja tsojkin ndamijagyapi.

¹³ Nay ja Dios Teety mmo'ojidip ja myøk'ajtin jøts xmīdanīdit ku sa mjattit, jade'ents ja mja'bikyidi jøts mgapøky'ijxyidi ku ja nwindson'ajtim Jesús jadigojk mye'ent møøt niduki'iyi pøn jaty ja Dios ja'ajtidip.

4

Sa ja Dios xajotkujk'ajtint

¹ Ixyamts øø mīgu'uk nnigajpxy jøts mee myiktukmadowdi ja nwindson'ajtim Jesús y'ana'amīngøjxp: jøts ku jade'en xun'ettit sa øøts ojts nyik'ixpiky jøts ku mdsøonīdit mdanīdit jade'en sa ja Dios ttajotkujk'aty. Tun'ettits meets ja jade'en.

² Mnija'widipxi ja ana'amīn midī myikmøødyi, midī øø tø nnigajpxy ku jade'en tyikutuky ja nwindson'ajtim Jesús.

³ Ja' Dios chøjkpy jøts ja tu'ugyi xnadyamīyoxidit; jøts kidi nugo mnamyøøt'atyidi pøni ka'adam ja xniyaa'yidi pøni ka'adam ja xnidø'øxyidi,

⁴ ku pøn y'amajtskiwya'añ, ka'ap ja patki'iyi nīpøn tø'øxyøjk tkamøøt'att. Ja' øy wā'ats pidsømp jøts ja jade'en kø'øm ñawyindsø'øgiyi.

⁵ Jøts kidi nugo mbøkti ku mnachuj'ijxyidi ja'ayi sam ja jaa'y y'adi'ichin pøn ja Dios tkanija'wip.

⁶ Kidi pøn ja myīgu'uk ñidø'øxy twin'øø'nidi, møk nwindson'ajtim mdagubatidit, pø tøxi øø nnigajpxy.

⁷ Ja'ats adøm ja Dios tø xanibiktaajka'am jøts adøm øy tsuj njaa'y'ajtindit. Ka'ap ja jade'en wya'añ ja Dios jøts ja kya'øybī ndu'unint.

⁸ Jade'ents idø'øn, pøni pøn yø'øbi ixpøjkin tkamøjpiktakp kidi myigu'ugip ja jade'en wyinaty tyumpy, ja Dios idø'øn ja wyinaty jade'en kyamimadøøpy, pøn adøm ja y'Espiritu Santo tø xmø'øyim.

⁹ Wine'en ja tsojkin wine'en ja namya'ayin xem yam, ka' øts ja ngajpxwa'añ. Ti ja øts ja nugo njaañit, pø tøxi Dios kø'øm mdukjatyidi jøts xem yam mnamyayidit mnachokidit.

¹⁰ Ejtp meets ja mmigu'uk jade'en xminamyayi pøn ja Dios tjanchja'widip jam Macedonia. Ja'ayi ø nugo nnigajpxy jøts ja n'øyjaa'y'ajtin møk xjaakyik'awa'andit, jøts myøjit ja m'amigu'uk'ajtindi.

¹¹ Øy jotkujk idø'øn mdsøønidit mdanidit, ja mdunk ja mbøjk ja' idø'øn mjotmay'attip pø jade'enxi øø nxumiwa'añ,

¹² jøts ja abikpyi jaa'y mwindsø'øgiyidit jøts kidi ti mga'ijtxyidi.

Sa ja nwindsøn'ajtim jadigojk mye'ent

¹³ Mee migu'utøjk, ka'ap øø ndsøky jøts jadi'iñi mda'andit, ni xkanijawidinim sa yjatt añmi'oo'kpi, jøts kidi jade'en mjotmay'ookti sam jadu'uk yjotmay'ooktin pøn ka' ti awejx'ajtin tjagyapti, pøn tkanija'widip ja Dios.

¹⁴ Pøni nmibijkyimts adøm ja Jesús ku ja tø y'øøky jøts ku ja tø yjujkpyiky jadigojk, sudsots adøm ja ngamibøjkim jøts ku ja Jesús jadigojk wyimbett ku

ja Dios Teety ja mōōt tyikjujkyōkt ja añmi'oo'kpi pōn jaty ja wyinaty tō y'atsjanchjāwīyidi.

15 Paty idō'ōn myiktukmadowdi nwindson'ajtim y'ixpōjkingōjxp, jōts ku adōm, pōn jaty wyinaty jujky'ajtipnim ku ja nwindson'ajtim mye'ent, kidi adōmip tyimyjawyenigyōjindip jōts nika'anīm ja' pōn tō y'ookti.

16 Pō kō'ōmnimxi ja nwindson'ajtim kyidā'akt jam tsajpjotp jōts ja kyajpxt kyutujkingōjxp, jōts ja kyajpxt sam ja mōj ankilis, jōts ja pujxuujx ja tyiktu'unt midi ja Dios yja'ajtpy. Winetnimts ja yujkyōktit jawyeen pōn tō t'atsjanchjāwīdi ja Cristo, pōn tō y'ookti tyigōydi;

17 jōtsnim adōm pōn jujky tandipnim jaanimts adōm ja mōōt nnōjxindit yootsjōtpy mā ja nwindson'ajtim nminabyaajtindit jam tsajpwemp. Jōts ja nwindson'ajtim jade'en xemikōjxp nmōōtjujky'ajtindit.

18 Paty mjadyimñagyajpxjot'amōjkiyidit xem yam, yō'ōbi kajpxy yō'ōbi ayuujk myiktu'undip.

5

1 Migu'uktōjk, ka' chōkyi jōts o nja'at ti xōōw ti jumōjt mye'ent ja nwindson'ajtim.

2 Wā'atsxi meets ja xnijāwi jōts ku ja nwindson'ajtim yja'att jotmōñ tu'ukpi xōōw, yam ja wyinaty ka'ap pōn tjōp'ixy. Jotmōñ ja mye'ent sam ja maa'tspi koots y'atsmiñ.

3 Ku jāa'y wya'andit: “Jotkujk ixyam, ka' ti tyuñi, ka' ti kumay”, winets ja jotmōñ tyaja'atpatidi jōts ja ayo'on myo'ojidit mōk, jade'en tyaja'adidit sam ja tō'oxyōjk y'u'nkpikyīn pōn ja y'u'nk tnikōjxp'ajtp jōts niwine'en ja chookin ja tkapaattit.

4 Jøts meets migu'uktøjk, ka' meets mwimbeetsi mgugoodsi. Me'emp ja juuni xøøw ja nwindson'ajtim jøts ka' nugo jotkumoni mbaadiyidit ejxim ja jaa'y adsu'jky yikwimeech.

5 Pø Diosxi mjagyajpidip jøts adøm wimbeets kugoots nga'ijtyindi.

6 Paty ka'ap jade'en nugo njotmo'onindit sam jadu'ukpi y'adø'øtsta'an, njøp'ejxindip idø'øn ja' wijy kejy.

7 Pøn nugo najtspøki ejtp, ja wimbeets'ajtin ja kugoots'ajtin ja yikmajadakpy; jøts pøn mujkip kujxip, nay ja' ja yikmajadakpy.

8 Jøts kujaji kudøø'kxi adøm, patyts adøm ejtp wijy kejy n'ejtindit. Kuwani njanchja'windit amumjoojt ja Dios yja' jøts nnachojka'andit nnamyajya'andit. Jade'en idø'øn nnadyagubojka'andit ja Dios yja' ejxim ja soldadi ñadyagubøkya'an ja pyujx jøts ja nisa kyajaty. Jøts njøp'ejxindip adøm ja nitso'ok'ajtin, jade'en idø'øn ja ñamyayi tpaaty sam ja soldadi pyujxkujup midi ja kyubajk ja adanaajyiyip.

9 Pø kidi ja'ajipxi adøm ja Dios tø xanibiktaajka'am jøts adøm n'ayo'ombaajtindit, pø ja'axi ja chøjkpy jøts adøm ja øy'ajtin nitso'ok'ajtin nbaajtindit nwindson'ajtim Jesucristo køjxp.

10 Adømxi ja nwindson'ajtim Jesucristo tø xku'o'jkindi jøts adøm ja møøt njujky'ajtindit. Nbaajtimpxi ja' xemikøjxp øy njadyimyjajuky'ajtyindinim uk øy wyinaty tø njadyimyja'o'jknandi.

11 Paty jotmøk mnabyikta'agidit jøts xem yam mnabyudøkiyidit sam ixa mmendi mbatti.

Ku ja Pablo ja jaa'y tkajpxwiy pøn tø tjanchjawidi ja Dios

¹² Migu'uktøjkti, ndukmadooip ixyam jøts waani xwindsø'øgidit pøn ttundip ma meets jam, pøn jam nduu'møøjyidip, pøn jam mda'ana'amidip ja nwindson'ajtım yja'.

¹³ Øy tsuj xaxonda'aktit ku jade'en tyundi, yiktundi ja tuda'aky'ajtın, yikxon namyiyujy'atidi nixem niyam.

¹⁴ Jøts nayide'en migu'uktøjk ndani'ana'amdi, jøts xukja'gyukidit pøn katunwandip, kajpxjot'amøjkidi pøn yø'øbi tkadajotkukidi ku ja yikjemdundi yiktedundi, pudøkidi pøn waani jot'amutsk'ajtpnim jøts tuda'aky mjaa'y'attit øy pøn møøt.

¹⁵ Øyim mnay'ejxidit jøts kidi pøn nayide'en ttuñ ja myigu'uk sam ja tø kyayik'ødyuñın. Tum ja y'øybi ne'egi ejtp mdu'undip. Øy xwindsø'øgidit ja mmigu'uk nixem niyam jøts nayide'en øy pøn møøt.

¹⁶ Øy jotkujk m'ettit.

¹⁷ Ajot'at'etti ja Dios Teety.

¹⁸ Pøni ti jaty tuujnip, tukmøjajawidi tukunuu'kxyjawidi ja Dios, yø' ja Dios chøjkpy jøts meets jade'en xu'unt pøn jaty tjanchja'widip ja nwindson'ajtım Jesucristo.

¹⁹ Kidi ja Espiritu Santo xyiktuu'dujkidi ja myøk'ajtın midi meets ja mdunwa'anxiyip mjujky'ajtingøjxp.

²⁰ Jøts kidi xkagupøkti ja mmigu'uk pøn amuum kunuu'kxi ja Dios jøts ja tkajpxi ja Dios y'øgyajpxy ja Dios y'ømyadya'aky.

21 Yikxon tuki'iyi x'uk'ejxtit, jøts midi øy, ja'ats mbaajtidip.

22 Ixmajtskøxti ja kya'øypi.

23 Jøts nay ja Dios, pøn ja jotkujk'ajtin tyajkp, nay ja' wa'ats myik'ejtxiyidip ja mjaa'y'ajtindi kunim ja nwindson'ajtim Jesucristo wyinaty myiñ.

24 Pø tøxi ja Dios mwi'ijxyidi, jøts tiy janch ja wya'añ jøts tuki'iyi ja jade'en ttungøxt sa ja tø wya'añ.

Ku ja Pablo t'ukajxpoo'kxni ja myigu'uk

25 Migu'uktøjkti, ni'amido'owik øøts, nibøktso'owik øøts.

26 Yiknajxidik øøts ngajpxpoo'kxin jøts ja mmigu'uktøjk xkajpxpoo'kxtit sam ja Dios tsøkyin.

27 Jøts nayide'en ndanipøkti Dios y'ana'amingøjxp, jøts ya'at nøky xukmado'odit niduki'iyi ja mmigu'uk pøn ja Dios tjanchja'widip.

28 Mgunuu'kxidip ja nwindson'ajtim Jesucristo. Jade'en idø'on ja yjatt.

**Ja øgyajpxy ja ømyadya'aky midi xukpaajtimp
ja nitso'ok'ajtin
New Testament in Mixe, Tlahuitoltepec
(MX:mxp:Mixe, Tlahuitoltepec)**

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxp], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Tlahuitoltepec

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

422dcf73-46a5-5403-b423-8406ed76ac1d